



**4<sup>TA</sup> SESSIONE STRASURDINARIA DI U 2026**

**25 ET 26 DI GHJUGNU DI U 2026**

**4<sup>ÈME</sup> SESSION EXTRAORDINAIRE DE 2026**

**25 ET 26 JUIN 2026**

**N° 2026/E4/033**

**Question orale déposée par Mme Véronique PIETRI  
au nom du groupe « Core in Fronte »**

**OBJET : APICULTURA**

Sgiò Pridenti di u Cunsigliu esecutivu,  
Sgiò cunsiglieru esecutivu in carica di l'agricultura,

I testimunianzi di l'apicultori corsi sò oghji unanimi è particularmenti alarmanti.

À a surtita di st'inguernu, i perditi di culunii ghjugnani, in certi rugioni, à niveddi drammatichi, sin'à un bugnu nantu à duui. In pochi anni solu, i pruduzioni sò cascati di manera spittaculari è, pà parechji apicultori, hè oghji a parti maiò di u so redditu annuali chì hè missa in periculu.

Sta situazione ùn hè più quidda di difficoltà puntuali o cunghjunturali. L'avvena stessa di a filiera apicula corsa hè minacciata.

I causi sò numarosi è si aghjughjani l'una à l'altra : a prissioni sanitaria ligata à u varroa, u scambiamentu climaticu, i sicchini chì si ripetani, a mudificazioni di i ciculi di fiuritura, l'episodii di fretu tardivu, a rarifazioni di i risorsi meliferi è i sbilancii ecologichi è a polluzioni.

À tuttu què si aghjusta una difficoltà chì tocca oghji l'insemi di l'agricultura corsa : l'accessu à u fundiaru agriculu. Senza accessu à i spazii naturali è agriculi ùn ci pò essa filiera apicula durevuli.

Ma sta crisa ci devi dinò purtà à rifletta nant' à u nostru mudeddu di sviluppu è nant' à a nostra rispunsabilità cullettiva.

U ritiru prugressivu di i spazii naturali è agriculi, l'artificialisazioni di i tarreni è a prissioni criscenti esercitata nant' à l'ambienti ùn sò senza cunsequenzi nant' à a biodiversità è nant' à l'equilibrii da i quali dipendi a nostra agricultura. Si devi avè u curaghju di rifletta à un accunciamentu di u territoriu chì rispetti di più i nostri risorsi naturali è u nostru patrimoniù vivu.

À u listessu tempu, a quistioni di l'acqua diventa ogni annu più primurosa. I sicchini si moltiplicheghjani, i tensioni nant' à a risorsa impighjurisciani è parechji di i nostri filieri agriculi ni patiscini dighjà. Ùn avemi micca abbastanza anticipatu st'evuluzioni, nè capitu à tempu l'investimenti necessari da fà pà assicurà di manera durevuli sta risorsa essenziali. Si cumenciani à pena avà travaglii strutturali nantu à l'acqua.

L'abi ci mandani oghji un veru signali d'alerta.

Ciò chì i minaccia oghji pudaria dumani indebuliscia assai di più l'insemi di a nostra agricultura è u nostru patrimoniù naturali.

Parchì i cunsequenzi vani assai aldilà di a sola quistioni economica.

L'aba hè un aneddu maestru di i nostri ecosistemi. Cuntribuiscia à a pullinisazioni di a nostra flora, à u mantinimentu di numerosi pruduzioni agriculi, à a ricchezza di a nostra machja è à l'equilibriu di a nostra biodiversità. Più cà què, hè u patrimoniù vivu sanu chì hè oghji minacciatu.

U Meli di Corsica raprisenta unu di i più beddi successi di a nostra agricultura, una filiera d'eccezioni. Daretu à st'AOP ci sò un sapè fà ancestrali, un'aba adattata à u so territoriu, paisaghji, una storia è un'identità chì partecipeghjani pienamenti à a rinumata di a Corsica.

Di pettu à una situazione cusì eccezziunali, pinsemi chì a risposta ùn si pò limità à misuri puntuali.

Sapemi ch'è vo aveti ricivutu pocu fà i raprisintanti di a filiera apicula è spiremi chì issi scambii ani pussutu fà avanzà a riflessioni è l'azzioni publica nant' à stu sughjettu. Cridimi ch'eddu ci voli à custruiscia un veru pianu di salvezza, à l'altezza di i sfidi prutezzioni mittendu in ballu un insemi di misuri identificati.

Si tratta dinò di difenda a nostra autunomia alimentaria pruteghjendu i tarri agriculi, assicurendu à longu andà a risorsa in acqua pà ùn micca indebuliscia i filieri di pruduzioni è ùn micca essa dipendenti da u fora è vulnerabili.

Sapemi senta oghji u missaghju di i nostri abi.

Di pettu à sta situazione, chì dimarchji eti da metta in piazza pà fà ricunnoscia u carattaru eccezziunali di sta crisa ?

Chì misuri a Cullettività di Corsica conta metta in piazza pà sustena a filiera, pà mubilizà pienamenti i dispositivi europei esistenti, pà mubilizà u Statu o ancu a cuoperazioni mediterranea ?

Ma soprattutto, al di là di l'urgenza, ch'è visioni d'avvenna vultu custruiscia pà assicurà a sopravvivenza di a filiera apicula è, più largamenti, a resilienza agricola è alimentaria di a Corsica ?